

Sikûn Tesarõn **Pawre kot Tesarõn kamã Jejus kôt** **kwÿjê hwÿr wam kagà nẽ mẽn̄h kôt** **hõ kagà nẽ mẽn̄h**

Pawre na pre kagàja nhĩpêx nẽ ma Tesarõn kamã Jejus kôt hkwÿjê hwÿr kumẽ. Na pre hte Tesarõn kamã mẽ kãm Jejus ã mẽ hkurê xwÿnhjaja Jejus ã tanhmã mẽ homnuj to nhũm mẽ amnhĩ xà htÿx kamã hamak o pa. Hãmri nhũm Pawre mẽ harẽnh ma nẽ kagàja nhĩpêx nẽ mẽ hwÿr kumẽ. Nẽ kamã mẽ kãm mẽ hamaxpêr o hihtÿx. Nẽ mẽ kot arĩ Tĩrtũm kôt amnhĩ nhĩpêx mex o pa nẽ hamaxpêr kôt hamaxpêr o pa hã mẽ kãm karõ. Nẽ nhÿrmã Jejus akupÿn kaxkwa rũm mẽ pahpê hkrajê hwÿr wrÿk nẽ pika ho hapêx par ã mẽ kãm harẽ. ã na pre Pawre mẽ kãm kagàja kamã mẽ kãm ujarẽnh anẽ. Nẽ mẽ kãm:

¹ Pa Tesarõn nhõ xwÿnh kot Tĩrtũm kapêr mar kaxyw axpên wÿr mẽ apikuprõnh xwÿnhjaja? Xà mẽ amex na ka mẽ apa? Ixpê Pawre na pa axte mẽ awÿr kagà nhĩpêx nẽ kumẽ. Siras mẽ Ximotre mẽ pa mẽ awÿr kumẽ. Nà mẽ pahpê Mẽpanhĩpêxà maati Tĩrtũm mẽ Kra Jejus Kris kwÿ na pu mẽ.

² Jakamã na pa htem mẽ ato wa hwÿr rãhã ho ri ixpa. Wa kot mẽ akutã nojarêr rãhã ka mẽ ajamakêtkati nẽ apa kaxyw. Nẽ mẽmoj to mẽ akutã wa nojarêr rãhã ho pa kaxyw.

*Tĩrtũm kot nhỹrmã hkrajê nhĩpêx kati xwỳnhjê
homnuj tỳx ã harẽnh*

Wam Pêtre 4.12-19

³ Nê na ka htem amnhĩ kaxyw Tĩrtũm mã aja-
maxpêr tỳx mex o ri apa. Nê axpên kutã anojarê
rãhã nê. Na pa htem ã mẽ ate amnhĩ nhĩpêx
anhỹrja mã ijamaxpêr nê mẽ anhỹ hã ixkĩnh nê
Tĩrtũm mã mẽ anhỹ hã ixkĩnh ã amnhĩ jarê.

⁴ Nê nhỹhỹm ixpa nê nhỹri krĩm agjê nê kamã
Tĩrtũm kôt mẽ pahkwỳjê mã mẽ ato amỹra nê mẽ
kãm:

—E pa mẽ amã Tesarõn kamã Kris kwỳjê jarê ka
mê inhma. Nà mẽ õ krĩ kamã mẽ hkwỳjaja na htem
Kris ã mẽ hipêx kati ho pa nhũm htem amnhĩ xà
htỳx kamã hamak pê mex kêt nê pa. Tã nom tee ri
amnhĩ kukamã hamaxpêr o Jejus kaga hkêt nê. Na
htem arĩ hkôt amnhĩ nhĩpêx mex rãhã ho pa. Anê.

⁵ ã mẽ ate mẽ kutã amnhĩ nhĩpêx anhỹr o apaja
na hte Tĩrtũm hã mẽ apumu nê hkĩnh nê pa. Nê mẽ
akukamã hamaxpêr o:

—Mê kot Ixkra Jejus ã tanhmã mẽ hipêx to ho pa
htã ãm hãmri na htem mẽ kutã amnhĩ to htỳx o pa
nê mẽ umaj wa ixkaga hkêt nê. Na htem ã amnhĩ
nhĩpêx anê nê mẽ kêp ixkra hã amnhĩ to amnhĩrĩt
mex nê. Nà koja mẽ nhỹrmã wa ixri mex kumrêx
nê htĩr tũm nê pa ho pa.

Anhỹr o hamaxpêr.

⁶ Nê mẽ kot Kris ã mẽ anhĩpêx punuj xwỳnhjaja
koja Tĩrtũm nhỹrmã mẽ atã mẽ homnuj tỳx nê
nhũm mẽ amnhĩ xà htỳx kamã hamak rãhã ho pa.
Ãm hãmri koja ã mẽ atã mẽ hipêx anê.

⁷⁻¹⁰ Koja Pahihti Jejusja nhỹrmã man akupỹn
pika hwỳr hirã htỳx kãm wrỳ nhũm Tĩrtũm kapêr

o mẽ wrỳk xwỳnh xihtỳx xwỳnhjaja man hkôt wrỳ. Koja mẽ wrỳ hāmri nē mẽ kot amnhĩ tomnuj xwỳnhjê homnuj tỳx kumrêx. Jao ma mẽ kot amnhĩ xà htỳx kamã hamak tũm xàta wỳr mẽ rēnh pa nhũm mẽ kamã htĩr tũm nē amnhĩ xà htỳx kamã hamak rãhã ho pa ho pa. Koja ã Pahihtija amnhĩ nē mẽ kot hkôt amnhĩ xunhwỳr kêt xwỳnhjê rēnh anē nhũm mẽ pahkĩnhã Tĩrtũm mẽ Krata wa kuri mex nē pa hkêt nē. Nē mẽ pahkĩnh ã wa mex o wa mex nē wa hihtỳx o wa hihtỳx ã wa omunh kêt nē. Koja Pahihti Jejus nhỹrmã akupỹn wrỳ nē ã mẽ panê mẽ hipêx anē. Koja wrỳ pu mẽ amnhĩ kaxyw hkôt pajamaxpêr xwỳnhjaja amnhĩ wỳr omu nē pahkĩnh nē. Hāmri nē amnhĩ nhĩ nyw ã amnhĩ pumu nē kãm:

—Hêxta waa nē. Amex o amex Pahihti. Na ka pre mẽ inhnê ty hāmri nē mẽ inhmã mẽ inhĩ nyw gō. Kot paj mẽ Tĩrtũm mẽ war ari inhmex kumrêx nē ixtĩr tũm nē ixpa ho ixpa. ãm hāmri na ka ã mẽ ixto mex anē. Nã amex kumrêx o amex kumrêx Pahihti. Anē.

Ã kot puj mẽ pahpê hkwỳjaja amnhĩ tã kãm mex o mex ã harēnh anē. Ra mẽ ate mẽ ixkapêr mar nē hkôt amnhĩ xunhwỳr jakamã kot kaj mẽ ixpyrà nē ã kãm mex o mex ã harēnh anē.

Pawre kot Tesarōn nhõ xwỳnhjê ho Tĩrtũm wỳr ã harēnh

¹¹⁻¹² Nē na pa htem mẽ ato Tĩrtũm wỳr rãhã ho ixpa nē kãm:

—Pa Tĩrtũm? E Tesarōn kãm akrajaja na pa mẽ ho awỳ. Na ka hte Akra Pahihti Jejus Kris mẽ wa mẽ ho mex rax o apa. Jao amnhĩm mẽ arê nhũm mẽ ra kãm amnhĩ to mex prãm nē. Na htem amnhĩ

kaxyw Jejus mã hamaxpêr rãhã pê mẽmoj to axpên kutã nojarêt o pa. Jakamã kwa tanhmã mẽ hkrã hto kê mẽ akôt ã amnhĩ nhĩpêx anhỹr rãhã ho pa. Kêr ka mẽ kot akôt amnhĩ nhĩpêx o pa hã mẽ omu nẽ akĩnh nẽ mẽ kãm mẽ mex ã mẽ harê. Nhũm mẽ ate tanhmã mẽ ho mex to hã amnhĩ tã apumu hãmri nẽ mẽ amnhĩ pyrã nẽ amã amex o amex ã ajarênh rãhã ho pa. Anẽ.

2

Kot amnhĩ tomnuj tỳx kumrêx xwỳnh maati jarênh

Matêwre 24.23-25; Makre 13.14-23; Rukre 21.20-24; Wam Juãw 2.18-19; Apokarip 13.1-18

¹ Nẽ koja nhỹrmã mẽ panhõ Pahihti Jejus Kris akupỹn wrỳ pu mẽ ma kutã api nẽ kakrã kamã hkaxpa. Jakamã kwa Jejus kôt ixkwỳjaja.

² Koja mẽhõ mẽ awỳr mõ nẽ mẽ amã Jejus ra akupỹn wrỳk ã harênh japêr. Rỳ tanhmã mẽ amã Jejus hpôx xã hã arĩgro jarênh o hêx to nẽ mẽ amã:

—Kwa na ra Jejus akupỹn nojarêt. Koja tokyx akupỹn mẽ pahwỳr wrỳ. Semãn ja kamã rỳ ko. Apu hõ hã koja apu wrỳ rỳ ko.

Anhỹr o harê. Nẽ Tĩrtũm Karõ nhỹ hã ã kot mẽ amã harênh anhỹr ã amnhĩ jarê rỳ nhãm mẽhõ kot ã kãm harênh anhỹr ã harê. Rỳ pa ixte harênh nẽ hã kagã hã ijarê. Nom kwa kêr ka mẽ kapêr ma nẽ ãm ama nẽ hkôt ajamaxpêr kêt nẽ. Rỳ ama nẽ tee ri amnhĩ kukamã ajamaxpêr kêt nẽ. Koja mẽhõ ã mẽ amã Jejus tokyx wrỳk ã harênh anẽ nẽ ãm amnhĩ krã hkôt ã harênh anhỹr o hêx. Nom Tĩrtũm Karõ nhỹ hã rỳ pa inhỹ hã rỳ nhãm Kris kôt mẽ panhõ nhỹ hã ã harênh anhỹr kêt nẽ.

3-4 Jakamã kêr ka mẽ ãm mẽ kot harënh o hêxja ma nê hkôt ajamaxpêr kêt nê. Kormã Pahihtijê Jesusja akupÿn nojarêr kêt. E kot paj ixprî hã mẽ amã ja jarê ka mẽ inhma. Nã kormã Pahihtijê akupÿn nojarêr kêt ri koja mẽ ohtô rax kumrêx nê Tirtûm kutã amnhî xunhwÿ nê kãm hkurê ho pa. Nê amnhî tomnuj tÿx o pa. Hãmri nhûm ra kot amnhî tomnuj tÿx kumrêx xwÿnh maatija amnhî to amnhîrît. Nom na pre ra Tirtûm tanhmã kot hipêx to hkukamã hã amnhî jarê. Koja xep gaa nê ma mẽ kot amnhî xà htÿx kamã hamak tûm xàta wÿr kumê nhûm kamã amnhî xà htÿx kamã hamak o pa rãhã nê pa ho pa.

Tã nom kormã Pahihtijê akupÿn wrÿk nê ma hwÿr mênh kêt ri koja mẽ piitã omu nê kêp Mêhpãm maati pixi hã harënh kaxyw mẽ kêp mẽ õ sãnti piitã hkrakrak pa. Nê mẽ kot mẽmo karõ ho amnhî pãm ã harënh xwÿnhja nhûm piitã hkrakrak pa. Hãmri nê axtem nê Tirtûm mã amnhî jarënh xà hã ixkre jatur xà kamã hitom wÿr axà nê kamã nhÿ nê hêx rom mẽ piitã mẽ kãm kêp Tirtûm ã amnhî to hêx nê mẽ kãm:

—E mẽ amnê ixpumu. Ixpê mẽ anhõ Tirtûm na pa. Pa kot kaj mẽ inhmã inhmex o inhmex ã ijarê. No kêr ka mẽ anhõ sãnti ho apãm o apa hkêr nê. Kwarî ho kwarî. ãm paxipix ixpê Mêapãm maati nê paxipix ixpê mẽ anhõ Tirtûm.

Anhÿr o amnhî to hêx.

⁵ Na pa pre arî mẽ akôt ixpa ri ã mẽ amã harënh anê. Mãn arî mẽ ate ja hã anohtÿx rÿ ko.

⁶ Nom kormã ã kot amnhî nhîpêx anhÿr xà hã arîgrota kormã kator kêt. Mêhõ kormã kot kêp ànnàr jakamã nhûm kormã kator kêt nê. Ra mẽ

ate kēp àmnàr xwỳnhja jarēnh mar. Tã koja hpôx xà hã arĩgro kato nhũm kēp àmnàr xwỳnhhta kãm pry kaprã nhũm rĩ kormã mō.

⁷ Nom na hte ra hpimxur pē Tĩrtũm nē mē piitã mē hkurē ho pa. Mē kot Tĩrtũm kôt amnhĩ xunhwỳr pymaj tanhmã nē mē ho ho pa. Nom kormã kēp àmnàr xwỳnhja kēp àmnàr jakamã nhũm hte mē noo mã tanhmã mē ho hkēt nē. Tã koja Tĩrtũm nhỹrmã kēp àmnàr xwỳnhja mã anē nhũm kuma nē kãm ure nhũm rĩ kormã amnhĩ to amnhĩrit nē mē piitã mē noo mã mō nē Tĩrtũm nē tanhmã mē kãm hēx to ho pa.

⁸⁻¹² Koja kato nē Satanasti mē wa mē piitã tanhmã mē nokupyr to ho ri mē hkôt pa. Nē hēx rom mē kãm aa mē kot mēmoj pumunh kēt kwỳ ho anhỹr o ri pa. Koja wa hēx rom te Tĩrtũm kot amnhĩ nhĩpēx pyrak o ã amnhĩ nhĩpēx anē. Hãmri nhũm mē kot Jejus kôt amnhĩ xunhwỳr kēt xwỳnhjaja ja hã wa omu nē wa hkôt hamaxpēr kurē kumrēx. Nē ãm hãmri wa kapēr ã wa hkamnhĩx. Kop apu ra mē kot Tĩrtũm kapēr mar nē hkôt amnhĩ xunhwỳr ronhỹx ra Tĩrtũm amnhĩ tã mē omu nē mē ho hkra. Nom koja mē kãm kapēr mar prãm kēt nē. ãm wa kot amnhĩ to hēx o wa pa xwỳnhhta kôt pix mã koja mē kãm amnhĩ nhĩpēx prãm.

Ja mỳrapē koja Tĩrtũm tee ri ja hã mē omu hãmri nē mē nē wa kot amnhĩ tomnuj tỳx xwỳnhhta wa omunh kēt nhũm wa tanhmã mē kãm amnhĩ nhĩpēx to nhũm mē wa omu nē wa hkôt hamaxpēr kurē kumrēx. Hãmri nē wa gryk ã Tĩrtũm kaga jakamã nhũm nhỹrmã mē kot amnhĩ xà htỳx kamã hamak tũm xàja wỳr mē rēnh pa.

Koja Satanasti mē kot amnhĩ tomnuj tỳx kumrēx

xwýnh maatita ã hêx rom tanhmã mẽ no kupyr to anhýr o pa rãhã nhũm Pahihti Jejusja hirã rax kãm akupýn mẽ pahwýr wrý. Hãmri nê kot amnhĩ tomnuj týx kumrêx xwýnh maatita ã amýnê nhũm mẽ kãm hpír kurê kumrêx nhũm hapêx. Koja ã amnhĩ nhĩpêx anê.

Tĩrtũm kot tanhmã mẽ pahto mex to hã harênh Rõmãn 8.28-30; Wam Tesarõn 2.13, 5.23-24

¹³ Nê amnepêm kormã mẽmoj kêt ri na pre Tĩrtũm amnhĩm mẽ arê. Mẽ ate kapêr mar nê hkôt amnhĩ xunhwýr nhũm kot mẽ ato hkra kaxyw mẽ arê. Kãm mẽ ajapêê. Na pre mẽ awýr amnhĩ Karõ rê nhũm mẽ akarõ mã agjê nê tanhmã mẽ ajamaxpêr to ka mẽ ý hã tãm amnhĩ nhĩpêx rãhã ho ri apa. Na pa htem ja hã mẽ amã ijamaxpêr nê mẽ anhý hã ixkĩnh kãm Tĩrtũm mã mẽ ajarênh o ri ixpa.

¹⁴ Na pre mẽ awýr mẽ ixrê. Mẽ ixte mẽ awýr ixpa nê mẽ amã tanhmã Jejus kot mẽ panê amnhĩ nhĩpêx to hã harênh o ixpa kaxyw. Mẽ ate mẽ inhmar nê Jejus kôt amnhĩ xunhwýr nhũm Tĩrtũm kot Pahihti Jejus Kris o mex pyrã nê tanhmã mẽ ato mex to kaxyw.

¹⁵ Jakamã kwa kêr ka mẽ ra mẽ ixte wam mẽ awýr kagã mênhta kamã harê nê mar týx nê. Nê mẽ akôt mẽ ixpa ri tanhmã mẽ ixte mẽ ajahkre htoja mã ajamaxpêr mex nê hã ano htýx nê hkôt amnhĩ nhĩpêx rãhã ho ri apa. Jao Jejus kôt amnhĩ nhĩpêx mex o ri apa Kris kôt ixkwýjaja.

¹⁶ Mẽpanhĩpêêxà maati mẽ Pahihti Jejus Kris wa kãm mẽ pajapê htýx kumrêx. Na hte wa tanhmã mẽ pajamaxpêr o hihtýx to ho pa pu mẽ wa ý hã

tãm pajamexpêr o ri papa. Nê wa ÿ hã nhÿrmã wa kuri pamex nê pahîr tûm nê papa hkukamã pajamexpêr kaprÿ ho papa hkêt nê.

¹⁷ Na pa htem mẽ ato wa hwÿr o ixpa nê wa kãm:

—Pa Tirtûm mẽ Jejus wa? Kwa kêr ka wa tanhmã Tesarôn kamã akrajê mã mẽ hamaxpêr o hihtÿx to kê mẽ war anhÿ hã tãm amnhÿ nhÿpêx nê tãm hamaxpêr. Jao kapêr mex rãhã nê pa ho pa. Anê.

3

Tanhmã mẽ pahte axpên to Tirtûm wÿr to hã kot mẽ pamã karõ

Korosê 4.2-4

¹ Nê kwa Kris kôt mẽ ixtõ nê ixtõxjaja. Kêr ka mẽ amnhÿ xwar mẽ ixto Tirtûm wÿr rãhã ho ri apa. Mẽ ixte krÿ piitã hkôt mẽ kãm Jejus jarênh o ri mẽ hkôt ixpa nhÿm mẽ kot mẽ inhmar nê amnhÿ kaxyw Jejus kôt hamaxpêr kaxyw. Jao mẽ apyrã nê hkôt amnhÿ nhÿpêx mex o pa kaxyw.

² Nom koja mẽ piitã ã amnhÿ nhÿpêx anhÿr kêr nê. Mẽ hkwyjaja kãm Jejus jarênh mar prãm kêr jakamã kwa mẽ ixto Tirtûm wÿr kê mẽ inhnê mẽ omunh mex nê nhÿm mẽ Jejus ã tanhmã mẽ ixto hkêt nê.

³ Nê koja Pahihti tanhmã mẽ akrã hto ka mẽ ajamxpêr mex nê ÿ hã hkôt amnhÿ xunhwÿr tÿx o ri apa. Jakamã nhÿm Satanasti mẽ ate amnhÿ tomnuj hprãm xàj tee ri tanhmã mẽ anhÿpêx to kaprÿ nhÿm Pahihti mẽ anê omunh mex nê. Ra kot mẽ atã amnhÿ jarênh xà hkôt.

⁴ Koja ã mẽ anê hipêx anê ka mẽ ÿ hã tanhmã mẽ ixte mẽmoj tã mẽ amã karõ xà hkôt amnhÿ nhÿpêx mex o ri apa.

⁵ Tã kê Pahihiti tanhmã mẽ akrã hto ka mẽ Tĩrtũm pyrà nẽ mẽ piitã mẽ kamã axukaprĩ ho ri apa. Nẽ Pahihiti Kris pyrà nẽ mẽmoj punuj kutã amnhĩ to htỳx nẽ. Jao hkôt amnhĩ nhĩpêx mex rãhã ho ri apa.

Mẽ kãm kaga xwỳnhjê jarēnh

Wam Korīt 4.12; Epes 4.28; Wam Tesarōn 4.9-12

⁶ E kot paj hpãnhã Kris kôt mẽ pahkwỳ kãm kaga xwỳnhjê jarē ka mẽ inhma. Pahihiti Jejus nhỹ hã kot paj mẽ amã tanhmã mẽ harēnh to. Nà koja mẽ akwỳjaja kãm kaga nẽ amnhĩm mẽmoj tã àpēnh kêt japêr. Nẽ mẽ ixte mẽ axàpēnh mex o apa hã mẽ amã karōja kuhpa hã amnhĩm mẽmoj tã àpēnh kêt japêr. Koja mẽ ã amnhĩ nhĩpêx anẽ ka mẽ ja hã mẽ omu hãmri nẽ mẽ hkôt ri apa hkêt nẽ.

⁷⁻⁸ Xà mẽ pajaja na pa prem ma mẽ awỳr mō nẽ mẽ akôt inhmã kaga nẽ mẽmoj tã ixàpēnh kêt nẽ ri ixpa? Nà na pa prem mẽ apa kukwak ri ixàpkur pymaj ixàpēnh rũnh nẽ amnhĩ pa pix kukwak ri ixàpkur o ri ixpa. Na ka prem mẽ inhmã mẽmo mẽ apkur xà ho mra pa prem amarĩ amnhĩm hamỳnh nẽ hkur kêt nẽ. Na pa prem hpãnhã mẽ amã amnhĩre nẽ kormã kuku. Tã kêr ka mẽ ã amnhĩ nhĩpêx anhỹr o ri axpēn kôt apa nẽ amnhĩ pa pix kukwak ri apku. Nẽ mẽ amã kaga hã nhãm akwỳjê hpa kukwak ri axàpkur o ri apa kêt nẽ.

⁹ Na pa prem amnhĩ pa pix kukwak ri ixàpkur o ri mẽ akôt ixpa. Mẽ ate ja hã mẽ ixpumunh nẽ mẽ ixpyrà nẽ ã amnhĩ nhĩpêx anhỹr kaxyw. Nom mẽ ixte Jejus mã tanhmã mẽ ajahkre hto nhũm mẽ ate mẽ inhmar nẽ hpãnhã mẽ inhmã mẽ ixàpkur xà nhōrja Jejus mã tanhmã kute hkêt tã pa prem ã amnhĩ nhĩpêx anhỹr kêt nẽ. Mẽ ate ja hã

mẽ ixpumunh nẽ mẽ ixpyrà nẽ ã amnhĩ nhĩpêx anhỹr kaxyw na pa prem amnhĩ pa pix kukwak ri ixàpkur o ri mẽ akõt ixpa.

¹⁰ Na pa prem mẽ amã ja hã karõ ho:

—Koja mẽhõ kãm kaga nẽ àpênh kêt nẽ ka mẽ ja hã omu nẽ kãm õ hkêt nẽ. Kwār māmri apkur kêt nẽ kãm prãm nẽ ri pa nẽ amnhĩ pumu. Anẽ.

¹¹ Tã xep ra mẽ akwỳjaja ã amnhĩ nhĩpêx anẽ nẽ kãm kaga nẽ àpênh kêt nẽ amarĩ ri pa. Nẽ xep htỳx ri axpẽn jakwa kamã nhãm mẽ hixi ho rêr o ri pa.

¹² Kwa mẽ inhma Jejus kõt ixkwỳjaja. Kot paj Pahihti Jejus nhỹ hã mẽ amã mẽ kot ã amnhĩ nhĩpêx xwỳnhjê jarẽ ka mẽ inhma nẽ mẽ inhmar tỳx nẽ. Kêr ka mẽ kãm kaga xwỳnhjê mã anẽ kê mẽ jam ure nẽ hpãnhã àpênh mex o pa. Jao mẽ apyrà nẽ amnhĩ pa kukwak ri apkur o pa. Kêr ka mẽ ã mẽ kãm ixkapêr jarênh anẽ.

¹³ Nẽ kwa kêr ka mẽ axpẽn to mex o apata kaga hkêt nẽ.

¹⁴ E na pa mẽ ã Tirtũm nhỹ hã mẽmoj tã mẽ amã karõ nẽ hã kagà anẽ. Tã koja mẽhõ kamã harẽ nẽ kuma nẽ ãm kuma nẽ hkõt amnhĩ nhĩpêx kêt ka mẽ ja hã omu nẽ hkõt ri apa hkêt nẽ. Tokyx kot ja hã amnhĩ pumunh nẽ amnhĩ tã hpijaàm kaxyw.

¹⁵ Nom arĩ Kris kõt kêp mẽ akwỳ jakamã kêr ka mẽ arĩ kêp mẽ atõ rỳ atõx ã tãm hipêx nẽ kãm akapêr mex o ri apa. Nom te ho kêp mẽ akwỳ hkêt pyràk o kãm akapêr kêt nẽ.

Tanhmã Pawre kot mẽ ho Jejus wỳr to hã harênh

¹⁶⁻¹⁸ Nẽ na pa hte mẽ ato Pahihti Jejus wỳr rãhã ho ixpa. Kot mẽ pamã mẽ pajamakêtkati xà nhõr jakamã na pa htem mẽ ato kuwỳ nẽ kãm:

—Pa Pahihti? Kwa kêr ka Tesarõn kamã akwỳjê pumu nê mẽmoj to mẽ kutã anojarêr rãhã ho ri mẽ hkõt apa. Kê mẽ hamakêtkati nê àmnhĩx pa ho pa. Anê.

Tã ãm ja pix. Ixpê Pawre na pa kagà jatur xà kamã inhĩkra ho amnhĩ nhĩxi nhĩpêx. Na hte kagà nhĩpêx xwỳnh inhmã ixkapêr ã kagà. Nê hã kagà hpa pa hpãnhã hatur xà kamã pam inhĩxi nhĩpêx. Tã na hapêx.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files
dated 29 Jan 2022

383a4e22-34cd-505f-9cc2-2f9921e7aa9f